

## МЕСЯЦА АПРЕЛЯ В 14-Й ДЕНЬ

### СВЯТЫХ МУЧЕНИК АНТОНИЯ, ИОАННА И ЕВСТАФИЯ, В ВИЛЬНЕ ПОСТРАДАВШИХ НА ВЕЛИЦЕЙ ВЕЧЕРНИ

Блажен муж: 1-й антифон. На Господи, возвах: стихиры на 6, глас 4.

Подобен: Яко добля:

**В**еры предборителие, \* благочестия поборницы, \* Церкви звезды многосветлыя, \* льсти тьму умалившие благодатию \* и свет истиннаго Богопознания светяще, \* восхваляем вас священными песньми, \* Божественнии и мудрии страдальцы \* Антоние, Иоанне и Евстафие.

**Н**ебеса, поведающа Божия таинства \* и славу всем возвещающа, \* мученицы Божественнии бысте, \* ибо вещание подвигов и веры ваша \* во вся концы Православныя Церкви изыде. \* Темже вся Церковь почитает страдания ваша, \* яже подъясте доблественно о Христе, приснославнии.

**Л**ыстом твоим сокрушенным и костью, \* приснопамятне Евстафие, \* и бедам твоим, паче естества сотранным, \* и носу и ушью урезанным \* радовался еси, всеблаженне, \* змиеву главу идолослужения отсекая. \* Сего ради подвигоположник Христос Бог \* венец победный дарова тебе.

**П**равославно уверовавше в Троицу Пребожественную, \* научени пресвитером Нестором, \* просветитесь Духом Святым, прехвальнии, \* и, на миродержца ополчившися, \* козни его мужески победисте, \* пособием Божиим на него подвигшися. \* Тем днесь пресветлую вашу память совершающе, \* по долгу хвалами ваше почитаем страдание.

**Р**анам предавшися и мукам, святии, \* непреклонна премудростию пребысте, \* яко свечи, разжегшися теплотою духовною, \* просвещаете сердца верных благодатию \* и отгоняете всяк недуг и всяку скорбь. \* Темже всяческий род и возраст \* празднует вашу святую память, \* песньми славяще Господа.

**С**ветлостию, мученицы, чудес ваших \* всю просветисте тварь, \* отгоняюще мглу страстей и скорбей, \* бесовских наваждений и болезней \* от притекающих к вам со слезами \* и верою просящих вашего заступления, \* доблии страдальцы Спасовы \* Антоние, Иоанне и Евстафие. \* Темже верою святое и светоносное \* ваше совершаем торжество.

Слава, глас 6:

**Ц**ерковь днесь празднует светло, \* в нову одежду одеявшися, \* яко порфирию и виссом, \* кровию и страданием новых стратотерпец: \* сии бо, в благочестии воспитавшися, \* жертву непорочну, приятну и благоугодну \* принесоша Ти, Христе. \* Темже, Спасе наш, Боже, \* сих победители беззаконных показавый, \* венчавый и прославивый, \* низпосли нам тех молитвами велию милость.

И ныне, Богородичен:

**К**то Тебе не ублажит, Пресвятая Дево; \* кто ли не воспоет Твоего Пречистаго Рождества; \* безлетно бо от Отца Возсиявый Сын Единородный, \* Тойже от Тебе, Чистыя, пройде, \* неизреченно воплощся: \* естеством Бог сый, \* и естеством быв Человек нас ради, \* не во двою лицу Разделяемый, \* но во Двою Естеству \* неслитно Познаваемый. \* Того моли, Чистая, Всеблаженная, \* помиловатися душам нашим.

## Вход. Прокимен дне и чтения.

### Пророчества Исаиина чтение (глава 43):

**Т**ако глаголет Господь: вси языцы собрашася вкупе, и соберутся князи от них. Кто возвестит сия? или, яже исперва, кто возвестит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и Отрок Мой, Егоже избрах: да увесте, и веруете Ми, и уразумеете, яко Аз есмь. Прежде Мене не бысть ин бог, и по Мне не будет. Аз Бог, и несть, разве Мене, спасаяй. Аз возвестих и спасох, укорих и не бе в вас чуждий. Вы Мне свидетели, и Аз Свидетель, глаголет Господь Бог. Еще от начала, и несть изымаяй от руку Моею. Сотворю, и кто отвратит е? Тако глаголет Господь Бог, избавляяй вас, Святыи Израилев.

### Премудрости Соломоновы чтение (глава 3):

**П**раведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их: и еже от нас шествие – сокрушение, они же суть в мире. Ибо пред лицом человеческим, аще и муку приимут, упование их безсмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющиися Нань разумеют истину и вернии в любви пребудут Ему. Яко благодать и милость в преподобных Его и посещение во избранных Его.

### Премудрости Соломоновы чтение (глава 4):

**П**раведник, аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости – житие нескверное. Благоугоден Богови быв, возлюблен бысть, и живый посреде грешников, проставлен бысть. Восхищен бысть, да не злоба изменит разум его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеву душа его, сего ради потщася от среды лукавствия. Людие же видевше и не разумеюще, ниже положше в помышлении таковое, яко благодать и милость в преподобных Его и посещение во избранных Его.

### На стиховне стихиры, глас 4.

#### Подобен: Яко добля:

**Я**ко звезды многосветлыя, \* страсотерпцы прехвальнии, \* Божественными светлостьми озаряете вселенныя концы, \* демонскаго омрачения и страстей тлетворных и бед изымающе. \* Темже днесь светлое, и светоносное, \* и святое ваше торжество, \* сошедшеся, восхвалим, славнии.

**Стих:** Воззваша праведнии, \* и Господь услыша их.

**Ч**уднии, Божественнии, премудрии страсотерпцы \* песньми священными да почтутся: \* Троицу бо Несозданную пред враги священо проповедающе, \* многобожную угасиша лесь кровными излианиями \* и славу прияша неувядаемую.

**Стих:** Многи скорби праведным, \* и от всех их избавит я Господь.

**Царя** беззаконного, \* беззаконно повелевающаго поклонитися \* и чести принести безсловесным богом бездушным, \* блаженнии, мудре посрамисте, \* мученицы великоименитии, \* и, пострадавшие терпеливно и законно, \* венцы исплетосте победы, \* о мире молящися.

**Слава, глас 6:**

**Полк** Боговенчанен ныне явльшихся мученик, \* за коление непорочное, за Христа пожренное усердно, \* святоизбранное воинство, \* мучениколюбцы, приидите, всесвященную память духовно совершающе, \* возопием к ним: \* сокрушите свирепство агарян безбожных \* и избавите люди благочестномудренныя молитвами вашими \* всякаго обстояния.

**И ныне, Богородичен:**

**Бога,** из Тебе воплотившагося, разумехом, Богородице Дево, \* Того моли о спасении душ наших.

**Тропарь, глас 4:**

**Иже** земных чести и славы отвергшися, \* доблии и честнии страдальцы, \* веры ради крепко и мужественно муки претерпесте, \* на смерть себе вдавшие за Живот всех – Владыку. \* Темже и Христос преславно столпом облачным \* с Небесе вас озари \* и почестьми и венцы от Престола славы венча. \* Со Ангелы Тому предстояще, \* молитесь спастися душам нашим.

**Ин тропарь, глас тойже:**

**От** корене неплодна, преблаженнии, \* возрадивше Православныя веры ветви, \* первомучеником тезоименитии явистесь: \* злаго бо и нечестиваго князя ярости не убоястесь, \* повелевающа Христа отрещися. \* Сего ради мученичския венцы приемше \* и со Ангелы Престолу Владычню предстояще, \* о нас молитесь, преблаженнии, \* православно чтущих святую память вашу.

**Слава, и ныне, Богородичен, глас тойже:**

**Еже** от века утаенное, \* и ангелом несведомое таинство: \* Тобою Богородице сущым на земли явился Бог, \* в неслитном соединении воплощаемь, \* и крест волею нас ради восприим, \* имже воскресив первозданнаго, \* спасе от смерти души наша.

## НА УТРЕНИ

На Бог Господь: тропарь святым, глас 4:

**И**же земных чести и славы отвергшися, \* доблии и честнии страдальцы, \* веры ради крепко и мужественно муки претерпесте, \* на смерть себе вдавше за Живот всех – Владыку. \* Темже и Христос преславно столпом облачным \* с Небесе вас озари \* и почестьми и венцы от Престола славы венча. \* Со Ангелы Тому предстояще, \* молитесь спастися душам нашим. [Дважды]

Слава, и ныне, Богородичен, глас тойже:

**Е**же от века утаенное, \* и ангелом несведомое таинство: \* Тобою Богородице сущым на земли явился Бог, \* в неслитном соединении воплощаемь, \* и крест волею нас ради восприим, \* имже воскресив первозданного, \* спасе от смерти души наша.

По 1-м стихословии седален, глас 4.

Подобен: Явился еси днесь:

**Ч**естную твердь церковную, яко звезды величайшия, просвещаете присно \* и верныя озаряете, мученицы Божественнии, Христовы воины.

Слава, и ныне, Богородичен:

**В** кров Твой, Пречистая Дево, прибегающих, мольбу приемлещи от нас, \* не престай молящи Человеколюбца спасти рабы Твоя.

По 2-м стихословии седален, глас 4.

Подобен: Вознесыйся на Крест:

**М**ужественнейшим помыслом прешедше мучение, чуднии страстотерпцы, \* сквозе огонь и воду проидосте \* и преминасте ко спасения широте, наследие приемше Небесное Царство, \* в немже творите о нас Божественныя мольбы, мудрии великомученицы.

Слава, и ныне, Богородичен:

**И**же благодарно воспеваем Ти от сердца и просим прилежно, Богородице, \* Твоя милости, Владычице, на рабы Твоя, зовущия и глаголющия: \* Пресвятая Дево, предвари и избави от враг видимых и невидимых и всякаго прещения, \* Ты бо еси наше заступление.

По полиелеи седален, глас 8:

**В**едомы бысте связаны от врагов \* и в темнице заключени на времена многа, верою соблюдаемы, невредни пребыте \* и, отрешшися мечи телес, святии, \* Божественным желанием яве связаетесь. \* Темже, яко светила, просияете в мире, вся просвещающе Духа благодатию, \* страстотерпцы блаженнии, молитесь Христа Бога грехов оставление даровати \* празднующим любовию святую память вашу.

Слава, и ныне, Богородичен:

**Я**ко Деву и Едину в Женах, Тя, без семени рождшую Бога плотию, \* вси ублажаем, роди человечестии: \* Огнь бо вселися в Тя Божества, \* и яко Младенца доиши Зиждителя и Господа. \* Тем, ангельский и человеческий род, достойно славим пресвятое рождество Твое и согласно вопием Ти: \* моли Христа Бога согрешений оставление даровати \* поклоняющимся верою пресвятому рождеству Твоему.

Степенна, 1-й антифон 4-го гласа.

Прокимен, глас 4: Воззваша праведнии, \* и Господь услыша их.

Стих: Многи скорби праведным, и от всех их избавит я Господь.

Всякое дыхание:

Евангелие от Матфея, зачало 36.

**Рече** Господь Своим учеником: се, аз посылаю вас яко овцы посреде волков, будите убо мудри яко змия, и цели яко голубие. Внемлите же от человек, предадут бо вы на сонмы, и на соборищах их бият вас. И пред владыки же и цари ведени будете Мене ради, во свидетельство им и языком. Егда же предадут вы, не пещытеся, како или что возглаголете. Не вы бо будете глаголющии, но Дух Отца вашего глаголай в вас. Предаст же брат брата на смерть и отец чадо, и востанут чада на родители и убьют их. И будете ненавидими всеми имени Моего ради, претерпевый же до конца, той спасен будет.

По 50-м псалме стихира, глас 6:

**Приидите**, возрадуемся Господеви, \* в память страстотерпцев, о празднолюбцы! \* Приидите, воспоим, \* тайно восхваляюще, страдалец Христовых, \* лествидольскую пагубе предавших \* и Христа посреде судища ясно проповедавших. \* Темже, о всеблаженнии и многострадальнии, \* не престайте молящися о душах наших.

Канон мучеником на 4, глас 4.

Песнь 1

**Ирмос:** Моря чермную пучину \* невлажными стопами \* древний пешествовав Израиль, \* крестообразными Моисеовыми руками \* Амаликову силу в пустыни победил есть.

**Добротою** мучения, славнии, удобряеми и Божественнаго света паче естества исполняеми, мученицы, иже вашу чтущих память отонуду осияваете.

**Глаголы** мучителя небрегоша, Божественнии мученицы, ярость, гнев и гордыню нивочтоже вмениша и благохвально смерть, веселящися, претерпеша.

**Крепостию** утвердившися, святии, Вседержителевою, истиною во чресла державно препоясавшися, воистинну лукаваго силу и коварство разрушите.

**Богородичен:** Силы паче естественных соделаша, Божественнии мученицы, укрепляеми силою Твоею, Иисусе Всесильне, Иже в нашу немощь первее от Девы оболкийся.

Песнь 3

**Ирмос:** Веселится о Тебе Церковь Твоя, Христе, зовущи: \* Ты моя крепость, Господи, \* и прибежище, и утверждение.

**Любовь** ко Господу восприемше, истиннии мученицы, о Нем радующися, воистинну души предаша.

**Телесем** и душам целители вас, премудрии, показа, Иже ваше страдание и терпение Приемый.

**Прелесть** древнюю оттрясше, твердии мученицы, новую изволисте жизнь, живуще о Христе паче человека.

**Богородичен:** Дне мя Света не вечерняго причастника сотвори, Мати Божия Всечистая, тьмы избавляющи будущия.

Седален мучеником, глас 1.

Подобен: Гроб Твой, Спасе:

**О**гню чувственному не принесосте чести, \* избавистеся огня геенскаго, Богоглаголивии, \* огню и мукам приобщившеся, святии, \* не отвергостеся Иже всех Владыки, \* но, радующеся, до смерти хранити веру потщастеся.

Слава, глас 8:

**О**гнем мучения, яко злато в горниле, искушении, \* светло искуситеся, приснопамятнии мученицы, \* и явистеся злата честнейши естеством, \* яко душевную доброту пресветлу показавше, \* сосуд Владыце честнейший воистинну принесосте, святии, огню не послуживше. \* Сего ради молитесь ко Господу о всех нас, \* грехов оставление даровати чтущим любовию память вашу.

И ныне, Богородичен:

**М**олитвы Своих рабов приими, Богородице, \* и избави ны от всякия беды, \* яко рождающая Христа, Спаса душ наших.

Крестобогородичен:

**И**же Твое заступление стяжавше, Пречистая, \* и Твоими молитвами от напастей избавляеми, \* Крестом бо Сына Твоего везде сохраняеми, \* по долгу Тя вси благочестно величаем.

Песнь 4

**Ирмос: Вознесена Тя видевши Церковь на Кресте, \* Солнце Праведное, \* ста в чине своем, \* достойно взывающи: \* слава силе Твоей, Господи.**

**К**репчайшим противлением доблии и стремлением неотложнии, друзии Маккавеи явистеся, повелевающих ярости не убоястесь, скверная ясти не изволивше.

**С** Горними силами предстояще всеми Владыющему, мученицы доблии, вас почитающих напастей избавите и вечнаго мучения.

**Н**ескверно дарование соблюдоше всечестнаго крещения, Твои страстотерпцы сие честнейше соделаша, сладко смерти Твоей поревноваше.

**Т**воей смерти мученицы доблии, Владыко Христе, подобящеся, повешени на древе, радующеся, души предаша Ти, – слава силе Твоей, – поюще.

**Богородичен: Величия Ти сотвори Владыка, Един Сый, Владычице, силен крепостию, якоже прорекла еси, ибо блажат Тя вси роди, Непорочная.**

Песнь 5

**Ирмос: Ты, Господи, мой Свет, \* в мир пришел еси, \* Свет Святый, обращающий из мрачна неведения \* верою воспевающий Тя.**

**Ч**ертог вменисте первый темницу, блаженнии, тамо бо Жениху Красному, радующеся, мученицы, обручистеся, Егоже ради уязвлени душами, неудержимым желанием к Нему устремистеся.

**К**расен еси, Владыко, и в след Тебе течем чистыми душами, Женише, – троица мученик вопияше, радующеся, – Твоею любовию, якоже зриши, связахомся и Божественным Ти рачением.

**Х**одисте по Владыце, святии, имуще воду живу биющу, сладко подвижущую вас к подвигом мучения, Христову чашу весело исписте.

**Богородичен:** Твоя, Богоневесто, славы земля исполнися, и к Себе святых вся лики светло привлече, мира сладкая оставити сих повинующи и получитьи Твоя светлости.

### Песнь 6

**Ирмос:** Пожру Ти со гласом хваления, Господи, \* Церковь вопиет Ти, \* от бесовския крове очищися \* ради милости от ребр Твоих \* истекшею Кровию.

**Жезлы** немилостивно мученик Евстафий приклоняемь, всячески стенание или слезу не испусти: крепкаго бо адаманта бяше твердейший.

**Возмог** еси, силою Божественною укрепляемь, мучениче Евстафие, терпети муки нестерпимыя, блаженне, сего ради Божественнаго веселия сподобился еси.

**Полцы** лукавых бесов побеждени быша мученик множеством кровей, и крепится Твоя Церковь, Жизнодавче, воспеваюци Твоей силе славу.

**Богородичен:** Добротою девства сияюци, Владычице, Цареве веков избрана была еси в жилище, Егоже раждаеши, по рождестве соблюдающаго Тя нетленну.

### Кондак, глас 3.

**Подобен:** Дева днесь:

**Отеческую** прелесть оставльше, святии, \* приведетесь Христови, \* всем души усердием стате мужемудренно до смерти. \* Темже и взяте победы почесть воистинну, \* о всех Владыку нашего непрестанно моляще.

**Икос:** Мученик подвиг любопразднственне видяще, мужеству их достойно почудимся, и со безплотными враги сих борению Ангелов ликове радуящися, сих ублажиша. Тамо бесовстии полцы, побеждаеми, лица отвращаху, тамо бо всех Владыка венцы славно украшает мученик главы. Сего ради возопием к ним: о всех, мученицы Христовы блаженнии, молитесь.

### Песнь 7

**Ирмос:** Спасый во огни авраамския Твоя отроки \* и халдеи убив, \* яже Правда праведно уловяше, \* препетый Господи, \* Боже отец наших, благословен еси.

**Искапаюци** радость и духовное веселие, явился нам честная вапа память, блаженнии, сердца услаждая, исполняюци радости премногия.

**Ум** вперил еси, блаженне, паче чувства добротами плененный, и сокрушения бедром не ощущал еси, блаженне Евстафие, и власом с плотию отрезанным ти терпел еси, яко адамант, в муках.

**Красота** телесная, мудре мучениче, и юности цвет возрастный, лик и желание нивочтоже вменися, сего ради, Евстафие, сладости ныне Божественныя восприемлещи.

**Носа** и ушию Тебе ради, Спасе, обрезан, мученик Евстафий Твою, Владыко, величаше силу и воплощение Твое пояше, сподобляюща того паче естественных терпений.

**Богородичен:** Яко спасение наше Тя, Богородице, молим: моли за ны воплощагося из Тебе.

## Песнь 8

**Ирмос:** Избавителю всех, Всесильне, \* посреде пламене благочествовавши, \* снизшед, оросил еси \* и научил еси пети: \* вся дела, благословите, пойте Господа.

**И**стекшая, преблаженнии, кровь ваша честная всю освяти тварь, множеством течения мученики соделавшая вас, ибо светло Бога проповедасте, вас ради умерша.

**Н**ерушимая Церкви основания, верным же крепкое предградие, стены твердейше, явистесь, мученицы Богоглаголивии, и нас всех крепко заступающе.

**З**емля содержит честная телеса ваша, Богоноснии, Небо же – души, тем веселитесь, мученицы, со Ангелы, Господеви трисвятую песнь поюще: благословите, вся дела Господня, Господа.

**Богородичен:** Страшна человеком смерть прежде рожества Твоего, Богородице, по сих же игралище святым вменися, ходатайствуя живот вечный.

## Песнь 9

**Ирмос:** Камень нерукосечный \* от несекомья горы, Тебе, Дево, \* краугольный отсечся, \* Христос, совокупивый разстоящая естества. \* Тем, веселящся, Тя, Богородице, величаем.

**В**озделан быв, яко ралом, словом твоим, Богомудре Антоние, чудный Евстафий, семя же прием, яко благая земля, Иоанн Богомудрый, иже мучения клас возрасти.

**В**еликим подвигом, премудрии, почести вземше, воздаяния трудом и болезнем от Бога приясте, мученицы, о нас Того молитесь, иже вас поминающих, святии.

**Н**ыне у Престола предстояще Царевы всех и будущих благ наслаждающесь, Богоблаженнии, чтущих поминайте вашу память священную.

**Богородичен:** Воды живыя исполнь веселия, благодати дарования проливаещи, всем сия независтно источая, Тебе бо ради даровася всяко благо миру, Владычице.

## Светилен:

**М**учения добротами осиявшеся, \* от Бога воздаяние трудом ныне приясте воистинну, \* о нас, мученицы, Благодателя молитесь.

## Слава, и ныне, Богородичен:

**В**елика Совета Ангела родила еси – Христа, Препетая Отроковице, Царя Славы, \* Егоже Крест мученицы вземше, во след Сего потекоша, \* с нимиже непрестанно о нас молися.

## На хвалитех стихиры, глас 4.

## Подобен: Дал еси знамение:

**И**муще, блаженнии, Христову Божественную силу, \* яко оружие непобедимое, \* отразисте вся силы бесовския \* и тьмы безплотных борец \* и победы почести взясте, \* темже предстояще Подвигоположнику Христу, \* о всех молитесь, чтущих память вашу. [Дважды.]

**О**гню не послуживше чувственному, приснопамятнии, \* и огню причастившеся и мукам, \* приясте Небесную росу, \* и покой Божественный, и вечную радость \* и, князя тьмы, мученицы премудрии, попаливше \* терпением болезней ваших, \* верных утвердисте ко истинному благочестию.

**К** пристанищу невлаемому пристасте, мученицы, \* мятежныя волны избавльшися, яко мудростнии, \* и треволения мятежа великаго, \* отнюдуже собирающе плод болезней – вечную жизнь, \* поминайте и нас, блаженнии, \* чтущих память вашу.

**Слава, глас 3:**

**Д**облественнии мученицы истиннии, \* вас ни нужда мучительская, ни ласкание льстивное, \* ни удов отрезание, \* ниже смерти прещение \* от Божественныя любве разлучити возможе, \* темже дерзновение имуще ко Христу, \* Иже над всеми Богу, \* просите от Христа и нам молитвами вашими \* даровати велию милость.

**И ныне, Богородичен, глас 8:**

**В**ладычице, прими молитвы раб Твоих \* и избави нас \* от всякия нужды и печали.

**Славословие великое и отпуст.**

## НА ЛИТУРГИИ

Блаженны от канона, песни 3-я и 6-я.

Любовь ко Господу восприемше, истиннии мученицы, о Нем радуящися, воистинну души предаша. [Дважды.]

Телесем и душам целители вас, премудрии, показа, Иже ваше страдание и терпение Приемый.

Прелесть древнюю оттрясше, твердии мученицы, новую изволисте жизнь, живуще о Христе паче человека.

Жезлы немилостивно мученик Евстафий приклоняемь, всячески стенание или слезу не испусти: крепкаго бо адаманта баше твердейший.

Возмогл еси, силою Божественною укрепляемь, мучениче Евстафие, терпети муки нестерпимыя, блаженне, сего ради Божественнаго веселия сподобился еси.

Слава: Полцы лукавых бесов побеждени быша мученик множеством кровей, и крепится Твоя Церковь, Жизнодавче, воспевающи Твоей силе славу.

И ныне: Богородичен: Добротою девства сияючи, Владычице, Цареве веков избрана была еси в жилище, Егоже раждаеши, по рождестве соблюдающаго Тя нетленну.

### Тропарь, глас 4:

Иже земных чести и славы отвергшися, \* доблии и честнии страдальцы, \* веры ради крепко и мужественно муки претерпесте, \* на смерть себе вдавше за Живот всех – Владыку. \* Темже и Христос преславно столпом облачным \* с Небесе вас озари \* и почестьми и венцы от Престола славы венча. \* Со Ангелы Тому предстояще, \* молитесь спастися душам нашим.

### Ин тропарь, глас тойже:

От корене неплодна, преблаженнии, \* возрадивше Православныя веры ветви, \* первомучеником тезоименитии явистесь: \* злаго бо и нечестиваго князя ярости не убоястесь, \* повелевающа Христа отрещися. \* Сего ради мученическия венцы приемше \* и со Ангелы Престолу Владычню предстояще, \* о нас молитесь, преблаженнии, \* православно чтущих святую память вашу.

### Кондак, глас 3.

Отеческую прелесть оставльше, святии, \* приведостесь Христови, \* всем души усердием стаете мужемудренно до смерти. \* Темже и взяте победы почесть воистинну, \* о всех Владыку нашего непрестанно моляще.

Прокимен, глас 4: Святым, иже суть на земли Его, \* удиви Господь вся хотения Своя в них.

Стих: Предзрех Господа предо мною выну, яко одесную мене есть, да не подвижуся.

### Апостол ко Ефесеем, зачало 233.

Братие, возмогайте о Господе и в державе крепости Его, облещьтесь во вся оружия Божия, яко возмощи вам стати противу кознем дьявольским, яко несть наша брань к крови и плоти, но к началом и ко властем и к миродержителем тмы века

сего, к духовом злобы поднебесным. Сего ради примите вся оружия Божия, да возможете противитися в день лют и вся содеявше стати. Станите убо препоясани чресла ваша истиною, и оболкшеся в броня правды, и обувше нозе во уготование благовествования мира, над всеми же восприимше щит веры, в немже возможете вся стрелы лукаваго разжженныя угасити. И шлем спасения восприимите, и мечь духовный, иже есть Глагол

**Аллилуия, глас 4: Воззваша праведнии, и Господь услыша их и от всех скорбей их избави их.**

**Стих: Многи скорби праведным, и от всех их избавит я Господь.**

### **Евангелие от Матфея, зачало 36.**

**Рече** Господь Своим учеником: се, аз посылаю вас яко овцы посреде волков, будите убо мудри яко змия, и цели яко голубие. Внемлите же от человек, предадут бо вы на сонмы, и на соборищах их бият вас. И пред владыки же и цари ведени будете Мене ради, во свидетельство им и языком. Егда же предадут вы, не пещытеся, како или что возглаголете. Не вы бо будете глаголющии, но Дух Отца вашего глаголай в вас. Предаст же брат брата на смерть и отец чадо, и востанут чада на родители и убият их. И будете ненавидими всеми имени Моего ради, претерпевый же до конца, той спасен будет.

**Причастен: Радуйтесь, праведнии:**

### **МОЛИТВА**

**Святии** мученицы Антоние, Иоанне и Евстафие! Призрите с Небеснаго чертога на требующих вашей помощи и не отвергните прошений наших, но, яко приснии благодетели и ходатаи наши, молитесь Христа Бога, да, Человеколюбив и Многомилостив Сый, сохранит нас от всякаго лютаго обстояния: от труса, потопа, огня, меча, нашествия иноплеменников и междоусобных брани. Да не осудит нас, грешных, по беззакониям нашим, и да не во зло обратим благая, даруемая нам от Всецедраго Бога, но во славу Святаго Имени Его и в прославление крепкаго вашего заступления. Да молитвами вашими даст нам Господь мир помыслов, воздержание от пагубных страстей и от всякия скверны и да укрепит во всем мире Свою Единую Святую Соборную и Апостольскую Церковь, юже стяжал есть Честною Своею Кровию. Молитесь прилежно, святии мученицы, да утвердит Христос Бог во святей Своей Православней Церкви живой дух правыя веры и благочестия, да вси члены ея, чистии от суемудрия и суеверия, духом и истиною поклоняются Ему и усердно пекутся о соблюдении Его заповедей, да мы вси в мире и благочестии поживем в настоящем веце и достигнем блаженныя вечныя жизни на Небеси благодатию Господа нашего Иисуса Христа, Ему же подобает всякая слава, честь и держава со Отцем и Святым Духом, ныне, и присно, и во веки веков. Аминь.